



## **En regurdientscha da Placi Monn - Berther 1930 – 2013**

Il Placi ei naschius ils 12 da fenadur 1930 a Rueras sco tierz affons dalla famiglia dil pur, marcadont e calger Placi ed Onna Catrina Monn-Venzin. Cun ses treis frars e sias treis soras ha il Placi passentau ina bial'affonza giudem il vitg da Rueras. A Rueras ha el era frequentau las scolas obligatoricas.

Suenter ha ei giu num ir egl jester a fadigar il paun da mintgadi. Il Placi ei staus fumegl a Landquart ed a Sagogn ha el luvrau tier in pasterner. Per segidar sil bein puril dil bab eis el puspei turnaus en sia patria. Cunquei ch'il frar vegl ha lu surpriu il bein puril, ha ei giu num encuir in'autra plazza ed el ha anflau laver sil baghetg. Aschia saveva il Placi raquintar, ch'el hagi gidau a baghegiar il bogn cuvretg a Sedrun.

Cullas pendicularas Sedrun/Rueras SA ein vegnidas fundadas 1962, anfla il Placi ina buna plazza per la stagiun d'unviern. A quell'interpresa stat el 33 onns, tochen la pensiun, fideivels. Spel runal deva el bugen ina paterlada culs hospes. Il Placi ha era absolvii ils cuors da patruglier e certins numnavan el schizun «Dr. Schiwago». Il contact cun autra glieud plascheva ad el zun fetg. Las stagiuns da stad luvrava el mintgai tier la vischnaunca sco luvrer d'uaul.

Il Placi ei era staus entgins onns activs ell'uniun da teater da Rueras, sco era el chor baselgia da Rueras. El era in bien giugadur ed in cantadur cun ferma vusch.

Igl onn 1968 marida il Placi sia vischina Victoria Berther ed els ein secasai en casa nova giudem il vitg da Rueras. Ord lur lètg neschan treis feglas, ch'eran sia luschezia. El ha adina giu bien quitau da sia famiglia, mava mintga di a fadigar e dedicava il temps liber a sia famiglia. Duront la pensiun ha Placi giu peda da guder ses hobbis, igl ir cun skis e la cuorsa liunga igl unviern ed ir cun velo ed a pesca il temps da stad. Da tutt'aura fageva el sia spassegiada ed entupava ils vischins per ina

paterlada. Fetg grond plascher haveva il tat Placi da ses biadis e sias bia-dias. Bein enqual giug ha il tat dau cun els en stiva, duront che la tatta semtgava ina buna marendia.

Fetg savens visitava il Placi la s.Messa, adina el medem baun, ella baselgia da Rueras. Era il s.Rusari recitava el fetg bugen. In'jamna avon sia mort eis el aunc staus enta Selva ad in bi pelegrinadi tier Nossadunna. Tut anetgamein ha Niessegner clamau gliendisdis, ils 19 d'uost il Placi, e siu cor ha calau da batter. El maunca a pign e grond e lai anavos ina gronda largia.

*La levada ei nossa cardientscha  
Il seveser nossa speronza  
La regurdientscha nossa carezia.*

Car um, bab e tat engrazia fetg per tut il bien che ti has fatg per nus e ruaussa en pasch.

Tia famiglia